

INUIT ATAQTIGIIT

Inatsisartuni



UKA2019/Imm. 36

10. oktober 2019

Múte Bourup Egede

Arferit angisuut nunatsinnut pisassiissutaasartut tamakkerneqarneq ajornerat pillugu aammalu tamakkerlugit pisarineqannginnerannut aporfiusartut qanoq iliuseqarnikkut piiarneqarsinnaanersut pillugu Naalackersuisut nalunaarusioqqullugit peqquneqarnissaannik Inatsisartut aalajangiiffigisassaattut siunnersuut. Nalunaarusiaq kingusinnerpaamik UKA2020-imi saqqummiunneqartussanngorlugu.

(Inatsisartunut Ilaasortaq Nikkulaat Jeremiassen, Siumut)

Inuit Ataqatigiit nunatsinni arferit angisuut pisassiissutaasartut ilaunni atorluarneqarnerulernissaat siunertaralugu, pisassiissutaasartullu tamakkerneqartannginnerannut aporfiit taakkunungalu iliussissanik pilersitsisoqarnissaa pillugu, Inatsisartunut ilaasortap Nikkulaat Jeremiassenip Naalackersuisunut nalunaarusioqqusineranut qutsavigalugu imaattumik oqaaseqaateqassaagut.

Pisassat iluanni nungusaataanngitsumik pisassiissutaareersut atorluarneqarnissaat siunnersuummi siunertarineqartoq, Inuit Ataqatigiit oqaloqataaffigissavaat. Neqissaqarniarnikkut imminullu pilersornitta annerulernissaanut aqqutissiuussinnaasut ilaattut isumaqarfigigatsigu. Anguniartuarparpummi nunatsinni ullumikkorniit annerusumik imminut pilersulertariaqartugut. Avataaniit isumalluuteqarnerput annikinnerpaaffianiitsinniarlugu, nunatsinnilu inuussutissarsiornikkut suliffissaqartitsinikkullu iluaqutissatsinnik aamma aningaasarsiornitsinnut iluaqutaasussamik inerisaaviususaaq qularinnginnatsigu.

Imminullu pilersornermi siuarsaanissaaq siunertaralugu sulinermi ukkatassarput ataasiinnaanngilaq. Nunatsinni piniarnikkut, aalisarnikkut nunalerinikkullu neqissaqarniarnitsinnik naatitsinikkullu annertunerusumik periarfissanik inerisaanikkut allatigullu aamma inerisaanitsigut avataaniit isumalluuteqarnerput annikillisarsinnaavarput.

Taamak suliaqarnermi qitiulluinnartutut isigaarput nunap immikkoortuini ineriartornermut pilersaarusiortoqarnissaa. Innuttaasut, inuussutissarsiortut, kommunit Namminersorlutillu Oqartussat suleqatigiinnerisigut, periarfissallu taaneqareersut akornanni peqataatitsiffiusumik ineriartortinnerisigut; Ullumikkorniit assigiinngisitaarnerusumik inuussutissarsiutit inuiaqatigiillu siuariartuutigisassaanik pilersitsisoqarsinnaanera upperigatsigu.

Siunnersuuteqartup anguniagaa tapersernartikkatsigu siunnersuut Aalisarnermut, Piniarnermut Nunalerinermullu Ataatsimiitsitaliamut ingerlateqqipparput. Tassani siunnersuutip siunertaata

INUIT ATAQATIGIIT

Inatsisartuni



nalunaarusiarineqaqqaarani sukkannerusumik piviusunngortinneqarsinnaanera
periarfissarsiuunneqassasoq inassutigalutigu.